



21. august 2009

UKA 2009/64

Inatsisartut suleriaasianni § 32 naapertorlugu aalajangiiffigisassatut siunnersuut imattoq matumuuna saqqummiupparput:

Inuussutissarsiutigalugu piniarnermut allagartat pigineqarsinnaanerinut ukiumut isertitat aalajangiisujunnaartinneqarnissaat, ukiumulli minnerpaamik ukiup affaata piniarnermut atorneqarsimanissaanik piumasaqaateqartoqalernissaa siunertaralugu Piniarneq aallaaniarnerlu pillugit Inatsisartut inatsisaata nr. 12, 29. oktober 1999-imeersup allangortinneqarnissaanik Naalakkersuisut sulissuteqaqqullugit Inatsisartut aalajangiiffigisassaattut siunnersuut.

(ATASSUT-ip Inatsisartuni ilaasortaatitai: Finn Karlsen, Siverth K. Heilmann, Knud Kristiansen)

Tunngavilersuut:

Pingaartumik ukiuni makkunani silaannaap allanngornerata kingunerisaanik piniarnermik inuussutissarsiuteqartortagut annikinngitsumik eqqorneqarput, taamaammallu aaqqiissutissat siunissamut attanneqarsinnaasut piaartumik inissinneqartariaqarput.

Tamanna tunngavigalugu ATASSUT-mit matuman siunnersuutigaarput inuussutissarsiutigalugu piniarnermik allagartamik pigisaqarsinnaanermut piumasaqaatit allangortinneqassasut, tamannalu pissasoq ukiumut isertitat apeqqutaatikkunnaarlugit paarlattuanik ukiumut piffissaq piniarnermut atorneqartoq piniarnermik allagartamik pigisaqarsinnaanermut aalajangiisunngortillugu.

ATASSUT-mit siunnersuutigissavarput ukiup isertitsiffiusup affaa piniarnermik inuussutissarsiuteqarnermut atorneqarsimappat inuussutissarsiutigalugu piniarnermut allagartap pigiinnarneqarnissaa inatsisitigut toqqammaveqartinneqalissasoq.

ATASSUT-mit qularutiginngilarput taamatut aaqqiinikkut piniarnermik inuussutissarsiuteqartut piniarnermit isertitaqarsinnaajunnaarfii ajornaatsumik allatigut isertitaqarsinnaaneq ammaanneqarpat piniarnermik inuussutissarsiuteqartut aningaasaqarnikkut toqqammavissarissaartinneqalissasut. Assersuutigiinnarlugu piniarsinnaajunnaarfip nalaani piniartut piniarnermik allagartaminnik arsaarneqarnissaminut aarleqquteqaratik kilisaatini inuttaasinnaalissapput imaluunniit allani sulisinnaalissapput, taamaalillutilu isertitaqarnikkut pitsaanerusumik toqqammavissaqalissasut.

Taamatut tunngavilersuuteqarluta siunnersuut Inatsisartunut oqaluuserisassanngortippalput.

Qujanaq.